



竹葉山杯舊是江南之曲畫橋烟柳最憐陌上之
遊簫遲樓畔灞陵悲殘照西風蛾鎖瓊窗簾外怨
梧桐秋井詞言情而長恨音變徵而衝冠銅雀柏
梁盡是埋愁之地明眸皓齒偏多出塞之人數聲
長笛淒落日之寒冰三疊陽關唱渭城之朝雨由
來藻筆盡屬騷人孝培蔣子卓犖多才體獨擅于
花間情原深于壚畔紅泉翠竹頻喚提壺細雨梅
花先過碧玉壯志激昂擲罷漁陽之鼓柔情婉約
拍翻塞北之笳曼聲作而素雲回紈袖飛而明月

下旣咏懷而命操亦臨水以登山訪邀笛之步花
落吳關弔馬嵬之遺峯青蜀道春鶻啼罷蒼梧暗
帝子祠邊環珮歸來夜月想明妃村畔西洲人遠
茫茫之海水空愁南國香殘渺渺之 城何處寫
盡恨人之句何妨豪士之懷僕磊落 倚脂韋玩
世樽無北海葛似西華賦就閒情識陶潛之寄傲
頌成酒德羨劉伶之獨醒衡宇蕭蕭種菜之英雄
自老鳴騶寂寂題橋之壯志空酬聊作弁辭多君
雅製竹山逸響宜付嬌娥三逕清風自成佳士儻
遇吳姬吹瑄願陪君柳下停驂如逢狎客題箋幸
借我花前置酒同里弟丁裔沆函巨氏拜草

姑夫蔣岵民先生雄才蓋代爽氣橫秋文過江淹
豈邀靈于綵筆學踰王肅不假夢于墨丸馳驟篇
章珠玉乃從心而得縱衡卷軸烟霞則應手而生
加以長者停車公卿推轂陳子昂之動衆無待碎
棊房次律之知名奚勞獻玉九重特達將陳寶劍
之篇千里空歸未薦阿房之賦崢泓海岳最擴胸
襟蕭瑟關河彌增意氣默觀窮達高視古今將欲
卜地一區擁書萬卷買山無計就我西園埽徑相
從爲君東道昔年絲竹乃太傅携妓之鄉今日棊

書卽右軍臨池之地于是丹青丘壑潤色林亭書
帷對碧嶂高褰墨彩並紅泉陡發新池荷葉裁作
酒杯舊院松枝折成塵尾遨遊無定有時登陶峴
之舟去住何心滿地種王猷之竹朝朝瓊尺吟必
侵宵夜夜金尊醉還達旦王裴倡和專說輞川皮
陸風流盛誇臨頓于今幽賞足配古人乃復繕寫
新詞別成一集新情振起逸興橫飛淨洗鉛華特
矜標格埽除脂粉獨見風姿將使山抹微雲自慚
傖父曉風殘月貽笑籊條世有賞音余非阿好更

陳戲論請驗他年恐詩興之潛消倏宦情之自動
金章墨綬遂騰茂而飛英岫幌岩扉定爭譏而竦
誚旣文旣博鍾山則猿鶴驚猜一詠一觴蘭亭則
畫圖寂寞姑留息壤以俟逋客重來歸我汶陽無
使丹崖再辱內姪柯煜敬序

杜陵綺語

卷之一

嘉善蔣光祖字孝培一字岵民

催雪

本意

瑟瑟閒亭蕭蕭涼苑仰見寒雲成陣只烏鵲驚飛
 金鴻少信窗外梅影橫斜捲簾鈎金鼎飄烟燼咏
 絮何時映書有待小窗人靜天冷冰初凝約三
 兩朋儕同傾珀醞奈故弄微晴蕩搖幌影待得瞞
 天絳色便帶暝昏昏還未穩借天工一霎嬉遊急
 灑萬川銀粉

水調歌頭

席上贈柯南陔

詞場誰跋扈愛爾腹便便手把玉簫親譜題滿碧
桃箋下筆提秦板柳振紙掀梁簸宋落句最輕圓
那識千秋業早擅妙英年 斟綠酒燃紅燭疊青
編胸中懊惱無限試與說當筵君爲飄零萼棣我
爲摧殘萱樹有淚幾時乾君健看鴻舉我老只鷗
眠

暗香

梅蕊

一枝幽絕見纖苞幾點未肯輕坼來尋昔夢不怕

嚴風并飛雪春色深含未露且消受林邊淒寂笑
月底無限濃情照徹幾分白 緣說恁時節人未
到花開吟管休急須憐真色待散粉飄瓊始堪惜
最好香來叢裏奈盼斷楊州狂客等嶺上春回也
又防狼藉

疎影

梅影

幾般瀟灑見墻外虬枝飄來低亞簾畔橫披水際
輕浮皓月當窗斜掛蕭然自與塵勞遠見肌粉含
風嬌姹倦看來的爍孤標疑是玉人舞罷借問

寧王舊事惜花人去誰記金鈴話且喜重來帳底
斗轉參橫幽芳微射人生萬事渾如夢且莫問羅
浮真假何須近玉骨冰姿早已枝枝堪畫

采桑子

霽園卽景四首

霽園無限春光好日午亭亭書卷初勻小鳥穿人
過水汀 嬌紅姹紫渾無力乳燕悻悻細柳青青
琢就新詩上畫屏

旋看入夏宜人也幾縷紅雲一簇桐陰如畫樓臺
翠染成 晚涼更有荷亭好月底羅裙水面飛螢

桂棹驚飛不暫停

無端便覺秋森爽漠漠烟林淡淡斜曛金粟香宜
暗裏尋 玉盤好試纖纖手早擘新橙來下簾旌
翠被輕寒酒乍醒

三冬一霎風淒緊雪滿山亭鴉落前津燈火微聞
打稻聲 簷前結得珊瑚子小飯青精好讀黃庭
烏几鑪芬澈夜清

西子粧

銅雀硯

烏鵲枝寒漳流露冷剩有春深故物古來紅粉不

勝愁只碧草烟埋成血啼殘百舌和粉膩宮墻流出只從今蘸墨濡毫文人作活 渾難說一自飄零白幾番人髮千載鶯花吹散了又來處經堂書窟漫誇金石與斯篆邕章同惜珍重也催起陳思才筆

探春

武夸茶

碧水丹山層溪疊嶂閩海神仙窟宅勝賞堪誇幽
芳可掬一路藤蘿翠滴傳說最高峯有錢鏗二子
飛鳥那知洞壑幽深千畹露芽堪浥 摘處盈盈

難述焙冉冉餘香斜裊簾隙蟹眼初煎龍團乍破
泉向鳳凰山汲高侶任盤桓沸松湍漫評品格試
話江南虎溪陽美誰匹

沁園春

讀陳檢討詞

陽美先生細譜新詞逕闢蠶叢正麗而有則歌紅
拾翠慷當以慨射虎屠龍跌宕誰如風流怎擬填
到迦陵字字工看逾好似珠圓成串玉潤加豐

嗟哉憔悴詩翁便獻賦金門老去逢念同時知遇
賣文爲活滿朝公論推轂成風早歲奔馳半生潦

倒博得雲郎別淚濃挑燈讀且巾箱別本伴我三
冬

木蘭花慢

追悼陸我謀朱子蓉兩姊文

王孫吹散去零落盡舊朋儕只東溪詩老東湖逸
叟一樣丰裁低徊當年舊事見歌場月榭昵裙釵
吟罷多成跌蕩醉餘幾許恢諧 堪哀俊侶擅雄
才分手各天涯念嶺表經年家山垂老心事雙乖
情懷渾無定據嘆招魂丘首共蒿萊夢去畫梁檣
尾埋來碧草閒苔

南鄉子

冬夜小飲

剪燭話良宵塊壘還憑濁酒澆月上窗櫺剛半吐
迢迢樹著濃霜葉暗彫 兒女慰無聊共向燈前
話寂寥絮語叮嚀關底事切切不信詩書悞汝曹

沁園春

聞馮穀園司成之變賦此志悼

丙寅之春浪跡都門曾辱公求時西賓罷講邀余
點勘東山未老且寄林丘朱鄭分甘綠窗把臂鄴
架千函向我投時未久嘆東西別去兩淚分流

時公

遊濟南予別至平陽故云

重逢鴛水湖樓常買棹隨波任所

留向孤山石畔拈題分韻棲賢院側洗盞凝眸我
掛歸帆公云顧我指點烟霞訂白頭堪訝事忽歸
鴻報我已馭仙輶

摸魚兒

咏蟹

問霜風幾番蕭瑟釀成寒色如許驀然雁陣驚秋
晚吹到蘆花淺渚月半吐見博帶蝦螳掉臂沙溪
尾裏糧整旅只公子腸空漁翁手辣縛就樊籠裏
咲坡老豈待無監州處撥動厨娘纖指朶頤詎
惜衣皆赭螯足擎來豪舉君記取君不見雌黃戈

甲烟波底爲時有幾只甕內糟團盤中薑綴醉睨
英雄壘

滿庭芳

咏雲

欲斷還連似飛仍駐無心出岫紛披浮空翳日誰
箇任推移多少祥光瑞靄昇仙去好駕丹梯凭闌
望泱泱鬣鬣舒卷正迷離須知遊六合重樓疊
閣底事爭奇但華封事杳難問金泥今日思親何
限太行畔幾朶孤飛終朝看非烟非霧翹首帝鄉
期

水滸系詩
減字木蘭花

遠客夜至卽爲別去謾賦

園林地僻何意柴門臨上客犬吠亭皋急向墻頭
過濁醪 寒溫無緒剛是乍來還乍去一晌匆匆
惆悵歸帆響朔風

賀新涼

呈錢塘詹事高公

天上神仙侶向人間携瓊弄玉來親烟水高卧雲
山無一事走入羲皇隊裏閒消受東湖寒暑聖世
豈無巢許輩只君恩深重何能已著書罷誰堪語
憶捧瑤箋心獨喜寫康節居貧樂道志原如此

錦繡胸藏誰箇似詎得久安鄉里亦曾念蕭蕭遊
子四十無聞我足耻只長貧濩落堪憐矣好擊劍
爲公起

望江南

紀遊雜憶十八首

姑蘇憶小繫鴨頭船鄧尉山前梅似雪生公石畔
鬢如烟春思艷吳天

錢塘憶花柳劇流連西子湖頭聽夜雨吳山頂上
送江船目斷兩峯寒

金陵憶裘馬自輕肥新月一鈎憐素襪故宮五畝

換烏衣臺落雨花微

澄江憶憶自卸輕裝安利橋邊沽酒肆睢陽廟角

博徒場彩幟舞長江

時端陽也

茸城憶峯泖足盤桓白苧飛花誇柳市紫芽軟玉

販余山鱸膾美東南

苕溪憶曾自放舟還醉踏栖賢花滿路狂吟峴首

月當灣白雀未經探

慧山憶一路掛松湍賣甕山家閒說餅艤船娼婦

競調絃邀客品山泉

揚州憶盼煞玉鈞斜地接紅橋停畫鷁巷垂綠柳
問瓊花歌吹竹西家

京口憶俯瞰大江流北固山前雲漠漠妙高臺下

水悠悠擊楫幾回頭

鳳城憶泗上立徘徊萬樹青杉城頂出

野一坏紅

粉路旁埋

虹縣虞姬墓

時憶大風才

淮上憶此地半曾經漭漭黃河聯北運滔滔青海

接東溟水陸問途程

萊陽憶兩度跨征鞍息影槐堂時賭醉負暄松院

足消寒過去一年年

濟南憶對酒憶王萃

字秋水

泉上一椽堪着膝篋中

千首任高吟歷下可空羣

太原憶貰酒任顏酡鎮日小車來易水幾番鐵騎

向滹沱取道井陘過

平陽憶懊惱度華年古廟叢祠臨道左荒坡敗驛

滿山田郵壁一題篇

桑乾憶裘葛我曾更月落牛車看北去日翻官蓋

擁南行留我是松筠

馮穀園司成書屋

天雄憶古郡傍城頭重過晚香花正綻遙臨瓠子
燕還留策騎過瑕丘
燕臺憶宮闕五雲邊駿骨誰論臺上價貂裘難禦
客中寒三度只空還

水調歌頭

懷當湖陸少叅公

人生能有幾一飯豈相忘回頭十年舊事真足淚
沾裳堂後鬪題命酒花下分箋屬和相與任徜徉
三載蠻烟地時復絆鸞凰欣歸里拜堂下喜難
量正好譚新話舊迢遞說中腸季子敝裘仍在無

奈霜飛染袂翻又墮愁鄉別後幾番語湘管寫難

詳

公還朝日予正在
衰經不及送行故云

菩薩蠻

過錢氏別業訪菊

誰家籬畔秋英好籠烟瓣落催花早映水有芙蓉
問花如不如移來多別種格比春花重聞說小
園南錢家闔麗妍

蝶戀花

雪夜用睡戲二字爲韻偶成四首

濁酒三杯貪美睡撲被蕭蕭風聒窗櫺語粉灑千
山瓊滿砌枝頭凍雀驚還起迫得愁人心欲死

等待天晴捲過殘冬矣誰識無聊支枕意駭童偏
喜獅兒戲

一盞燈昏渾欲睡骨冷魂清吟苦無新意試把紗
窗時一啓紛紛急向簷前墜灑遍江山如畫裏
漫把香醪酌罷何曾醉爲問春風來也未雙雙翠
羽梅邊戲

坐久呼杯童已睡萬馬騰空夜半風來異颼颼打
窗誰裂紙冰丸急撒聲偏碎自念征途當日事
野店溪橋有個人同倚一霎銷魂歌薤里酒闌歷

歷思遊戲

爐燼香殘真合睡
犬吠柴門疑是人
兒至屋後竹聲
吁可憐愁他壓倒
千竿翠欲語隣翁
翁已醉
記得人言道是
豐年瑞明日庭
柯俱白幟一軍
縞素天公戲

南鄉子

紀夢枕上作

獨夜擁寒衾
欹枕偏來夢底尋
斜並肩兒偎半晌
肌勻珍重詩翁一片心
依約似前生
撥得琵琶曲不成
暗擬雙柑還再劈
難明夢破愁人是五更

水調歌頭

對酒與周蒼霖皆六昆季言懷

把酒捐末事
顛倒任詼諧
天公有意生我何事苦
窮哉誰悼英雄失路那管明朝無酒且自咲
千回名教我儕任莫使寸心灰
千秋業鐘鼎計付深杯
君看盛衰興廢一點蒼苔
造化小兒無據路
鬼揶揄堪畏
明月掛胸懷
切勿戀鄉井名姓道旁埋

江城子

夜讀柯緯昭笙囊瑣語有感

歌闌酒罷話從前
啓殘編
淚潺湲
一似嬌紅早墮

雨風天愁煞鴛鴦驚散後思舊事咏花鈿年來
錦字問誰傳鼓離絃訴啼鵲幽怨聲聲難到玉樓
邊瓊尺粉毫何處所人去也蕩成烟

水調歌頭

排悶

園林繞幽趣風緊只凄其何況冰堅雪合種種助
愁思犬吠嚴城更鼓影動竹窗殘月戶外總堪疑
欲覓埋憂地往事莫攢眉 城市杳雙魚斷廢晨
炊長鬚欲起未起故向我徘徊謂我久耽烟水忘
却朝昏活計終窶固其宜人世作達耳長悒鬱奚

爲

十二時

寄曹蓼懷春坊

憶同時文場傑霸誰似當年曹植嗟往事同君遊
息燈火城南踪跡髻髻傷心蓼莪吟罷顧予相憐
惜那時有駿馬輕裘鬪酒呼盧爾我何曾掛臆
跨征鞍同遊上國題遍旗亭郵壁僧院聽鐘叢祠
賭識落帽歸鞭急倏飛騰鳳池一朝奮迅鱗翻
嘆升沉從茲遽判長江蹙劃南北燕市重來黑貂
裘壞有淚還憑君濕奈劉蕢依舊何當慰余岑寂

賀新涼

贈林旭上人閉關閱藏

精舍穿林樾碧琉璃寂無塵
滓龍湫獸窟中有一人揮塵尾
靜對巖花齊發常得句羣推
白雪千古英雄悲末路只老來
消受蒲團月未領會鬢先白
僧中島可詩中傑終則是濡
毫吮墨文人慧業那箇三生
能了悟又奚用齋魚敲澈還
只爲鈍根磨滅留却瞿曇千
卷在印禪燈且作慈航筏西
來意句叅活

水調歌頭

南陔席上贈吳門錢十青

瑟索誰爲侶三徑久苔封
風塵無限恹恹能識幾英雄
回首燕南趙北屈指山程水
驛踪跡任飄蓬結客須年少
有志不輕同東吳客來下里
乍相逢爲君傾倒試一拔劍吐
心胸應手珠璣錯落噴墨烟
雲繚繞破浪有長風更喜丹
丘子佐我一杯空

水調歌頭

柯寓匏歸自當湖述詹事高公垂問誌感

天畔誰憐我寒谷那生春
讓西托足幽園枳棘繞籬門
無事緝騷研易有暇種瓜鋤
菜相與任長貧

不料白頭母一去謝饗殮
年來事多顛倒劇悲
幸生平知己無幾何
况語言真道是頻頻問訊念
予笑笑孤獨說着涕縱橫
人世感恩地回首莫輕
論

偷聲木蘭花

新春蒼霖皆六見訪并訂翌日
之約

雪滿孤村門尚閉
展響閒堦人語細
鬪酒偏宜共
賦新詩一起余
燒殘紅燭剛逾半
暗裏年華容
易換漏箭頻催且喜明朝又舉杯

南鄉子

夜坐有懷

好夢向誰尋
手熱爐熏護短衾
梅影穿櫺低入戶
微吟剔破燈花斷了心
背地濕衣襟
一縷愁絲
着鬢侵追罷前歡
渾不是參橫自碎瑤琴
直至今

沁園春

懷孫靜涵於蘆山

憶與君遊兩在長安
相得甚歡正翩翩裘馬剛來
秋試離離印綬復赴春官
走馬天街連床蕭寺說
劍談詩儘可傳
時有幾恰三番寒暑
萬里郵籤
自同陸舫留連偶買得仙葩
贈所憐記刺梅花底
曾分強韻桑乾道上
劈寄蠻箋君拉同遊
余方羈

足自此飛鴻各一天憑高處望邛峽山頂仙吏盤

桓

杜陵綺語卷之一終

鹿谷山



